

REGLUGERÐ

um breytingu á reglugerð fyrir Íslenskar Getraunir, nr. 472 13. ágúst 1981.

1. gr.

Við 2. málsg. 10. gr. bætist: Stjórn Íslenskra Getrauna hefur heimild til að svipta umboðsaðila söluumboði fari hann ekki að reglum samningsins.

2. gr.

a. 1. málsg. 11. gr. orðist svo:

Getraunaseðlar skiptast í þrjá flokka eftir útfærslugerðum: Einfaldar raðir, heil margföldunarkerfi og minnkuð margföldunarkerfi.

b. Í stað 3. og 4. málsg. 11. gr. komi þrjár nýjar málsgreinar, svohljóðandi:

Á getraunaseðli, sem gerður er fyrir margföldunarkerfi, er prentaður einn aðaldálgur. Á getraunaseðli fyrir heil margföldunarkerfi hefur dálkurinn yfirskriftina K, og á seðli fyrir minnkuð margföldunarkerfi hefur hann yfirskriftina R. Er þá heimilt í samræmi við textann á seðlinum að setja eitt eða tvö aukamerki við tiltekinn fjölda leikja. Skulu seðlar fyrir minnkuð kerfi yfirfarnir í samræmi við þar til gerðar töflur, sem Íslenskar Getraunir gefa út.

Séu aukamerki fleiri en að framan greinir og seðillinn því með fleiri röðum en hann er ætlaður fyrir, er seðillinn ógildur. Séu merkin færri en tilgreint er á seðlinum, er seðillinn gildur og reiknast með þeim raðafjölda, sem á seðlinum er. Raðafjöldinn fæst með því að margfalda saman merkjafjöldann við þá leiki, sem bera fleiri en eitt merki. Leikur með tveimur merkjum er sagður vera tvítryggður og leikur með þremur merkjum þrítryggður. Kerfi með tveimur tvítryggingum og einni þrítryggingu er þannig $2 \times 2 \times 3 = 12$ raðir.

Íslenskum Getraunum er ekki heimilt að gefa út getraunaseðla með fleiri en 10368 röðum í heilu margföldunarkerfi. En í minnkuðu margföldunarkerfi má fjöldi raða ekki samsvara fleiri en 177147 röðum í heilu margföldunarkerfi.

3. gr.

a. 1. málsg. 12. gr., sbr. reglugerð nr. 315 7. ágúst 1985, orðist svo:

Verð hverrar getraunaraðar er kr. 5,00.

b. 3. málsg. 13. gr. orðist svo:

Af heildarupphæð vinninga skal 4% lagt í sérstakan sjóð. Sjóður þessi leggst við heildarupphæð vinninga 3 eða 4 sinnum á reikningsári eftir ákvörðun stjórnar Íslenskra Getrauna, þar af ávallt í síðustu leikviku hvers reikningsárs. Skal þessa jafnan minnst á seðlum viðkomandi leikviku. Heildarupphæð vinninga skiptist síðan í 2 hluta og skiptast

70% hennar milli þeirra seðla, sem flestar réttar ágiskanir hafa, en 30% skiptast milli þeirra seðla, sem næstflestar réttar ágiskanir hafa.

c. 6. málsg. 13. gr. orðist svo:

Vinningar, sem ekki ná kr. 350,00 skulu ekki greiddir út. Ef vinningshlutar í 2. flokki ná ekki kr. 350,00 bætist vinningsupphæð 2. flokks við vinningsupphæð 1. flokks og skiptist heildarvinningsupphæð vikunnar þá milli seðla í 1. vinningsflokki. Nú nær vinningshluti í 1. flokki ekki kr. 350,00, og fellur þá greiðsla vinninga í þeirri viku niður, en vinningsupphæðinni skal þá bætt við heildarvinningsupphæð næstu getraunaviku á eftir.

4. gr.

Reglugerð þessi, sem sett er samkvæmt heimild í lögum um getraunir, nr. 59 29. maí 1972, öðlast þegar gildi.

Dóms- og kirkjumálaráðuneytið, 20. ágúst 1986.

Jón Helgason.

Ólafur W. Stefánsson.

GJALDSKRÁ

Hitaveitu Reykjahlíðar.

1. gr.

Hitaveita Reykjahlíðar selur hitaorku frá aðveituæð og dreifikerfi veitunnar samkvæmt ákvæðum gjaldskrár þessarar.

2. gr.

Hitaveita Reykjahlíðar lætur hverju húsi, sem er í sambandi við vatnsæðar hennar í té vatnsmagn er ætla má að nægi til hitunar á húsinu, enda séu ofnar hússins nægilega stórir að dómi eftirlitsmanns hitaveitu.

Hitaveitan lætur setja stillanlegan hemil fyrir hámarksrennsli til upphitunarkerfis og miðast gjald hitaveitunnar fyrir selda orku við það hámark, sem hemillinn er stilltur á.

3. gr.

Einungis starfsmenn hitaveitunnar mega breyta stillingu vatnshemils þess, er um getur í 2. gr. Hitaveitan breytir stillingu hemils eftir óskum húseiganda fyrsta árið, sem hús hans er tengt við hitaveitukerfið, en síðan verður hemilsstillingu að jafnaði einungis breytt einu sinni á ári og skal beiðni um breytingu komið á framfæri við hitaveituna fyrir 1. janúar ár hvert.

Hámarksstilling hemils gildir fyrir allt árið, þótt orkunotkun verði minni hluta úr ári.

4. gr.

Gjöld fyrir afnot heita vatnsins miðast við rúmmál húsa, og eru sem hér segir:

- a) Fastagjald á ári fyrir hvert hús kr. 8 197,00
- b) Vatnsgjald á ári pr.m³ húss kr. 35,47

Þó skal reikna hálf gjald af bifreiða- og vélageymslum og óupphituðu rými í íbúðarhúsum.

Á gjöld þessi leggst söluskattur samkvæmt gildandi reglum á hverjum tíma.